



CENTAR

IZDAJE I ŠTAMPA OPĆINA CENTAR SARAJEVO • BILTEN JE BESPLATAN • DECEMBAR 2018 • BROJ 200


Novi Trg kod Pozorišta mladih



Održan drugi
“Bike fest” na Jezeru



Vodovdna i
kanalizaciona
mreža, te novi asfalt
u Kemal-begovoj



Sve je spremno za
održavanje EYOF-a
u Sarajevu

Općinsko vijeće Centar održalo vanrednu sjednicu o sigurnosnoj situaciji



Općinsko vijeće Centar održalo je 1. novembra 2018. godine 2. vanrednu sjednicu, a na dnevnom redu je bila sigurnosna situacija na području općine Centar. Sjednicu je vodio dopredsjedavajući Općinskog vijeća Mustafa Mulić.



Na početku sjednice prisutni su odali dužnu počast policajcima Adisu Šehoviću i Davoru Vujinoviću koji su brutalno ubijeni dok su obavljali dužnost.

O aktualnoj sigurnosnoj situaciji na području središnje gradske općine govorio je načelnik Druge policijske uprave Mirsad Đelilović i naglasio da, iako je u Kantonu Sarajevo stanje sigurnosti ozbiljno narušeno, na području

općine Centar je stabilno. Pri tome je iznio podatke da se u Centru kontinuirano u posljednje tri godine smanjuje broj krivičnih djela krađe motornih vozila (2016. godine 76, godinu kasnije 44, a u ovoj godini 39), kao i teških krađa i provala u kuće, stanove i poslovne prostore (u prvih šest mjeseci 2016. godine 232, u istom periodu naredne godine 160, a ove godine 114). Također je kazao da je u porastu broj krivičnih djela razbojništva, ali zahvaljujući mjerama i akcijama koje poduzimaju pripadnici policije smanjen je njihov broj posljednja dva mjeseca.

Priliv migranata

Načelnik Đelilović je iskazao zahvalnost Općini Centar na kontinuiranoj pomoći i podršci njihovom radu i uvjerenje da će tako biti i ubuduće kako bi odgovorili na sve sigurnosne izazove u cilju stvaranja što sigurnijeg prostora. Prema njegovim riječima, ovlasti policije su uglavnom dovoljne za njihovo djelovanje, ali je prisutan problem nedovoljnog broja ljudi i materijalnih sredstava i opreme i na tome se radi. Također je naglasio da je veoma važna dobra saradnja policije sa lokalnom zajednicom, što daje pozitivne rezultate. Općinskim vijećnicima se obratio i direktor Terenskog centra u Službi za poslove

sa strancima BiH Asim Kedić, koji je govorio o prilivu i kretanju migranata u BiH i uticaju na sigurnosnu situaciju u Kantonu Sarajevo i općini Centar. Pri tome je naglasio da je najveća koncentracija migranata u Unsko-sanskom i Sarajevskom kantonu te da povećanje broja prispjelih migranata u odnosu na prošlu godinu iznosi 1.000% i da je teško prognozirati budući priliv migranata u našu zemlju.

Prema Kedićevim riječima, situacija u Kantonu Sarajevo je zadovoljavajuća sa stanovišta sigurnosti, a općina Centar je zbog svoje lokacije najmanje pogođena valom migranata.

-U saradnji sa svim nadležnim institucijama poduzimaju se aktivnosti u pogledu kontrole njihovog ulaska, kretanja, smještaja, zbrinjavanja, primarne zdravstvene i socijalne zaštite, kazao je Kedić.

O aktivnostima Gorske

službe spašavanja vijećnicima je govorio rukovodilac Jedinice Općine Centar za spašavanje sa visina, na vodi i pod vodom Edin Merzić, a o programskim aktivnostima Crvenog križa Općine Centar predsjednik dr. Bakir Nakaš.

Nabavka opreme

U svom obraćanju vijećnicima općinski načelnik dr. Nedžad Ajnadžić je naglasio da će Općina Centar kao odgovorna društvena zajednica učiniti sve što je potrebno za sigurnost građana i njihove imovine.

-Ne treba da budemo izolovano ostrvo gdje je sve u redu, a da se u drugim općinama ubijaju policajci i građani. Želimo da Davor i Adis budu posljednje žrtve kriminalaca, dodao je Ajnadžić i iznio podatke o utrošku značajnih budžetskih sredstava Općine za jačanje sigurnosti na njenom području, što će činiti i ubuduće.

Predloženo je više zaključaka među kojima je i da se u općinskom budžetu za narednu godinu pojača finansijska stavka za nabavku materijalno-tehničkih sredstava: Drugoj policijskoj upravi, za proširenje sistema video nadzora na ulice, trgovu i druge prioritete, zatim za nabavku specijalističke opreme Gorske službe spašavanja, daljnje opremanje DVD Bjelave, kao i sredstva zdravstvenim ustanovama prema njihovim najprioritetnijim potrebama.



Tematska sjednica Općinskog vijeća Centar o zdravstvu

Nedostatak ljekara najveći problem

Šesta tematska sjednica Općinskog vijeća Centar održana je 19. novembra, a na dnevnom redu su bili izvještaji četiri kantonalne javne zdravstvene ustanove o radu i pružanju usluga na području središnje sarajevske općine u prošloj godini: Doma zdravlja Centar, Zavoda za javno zdravstvo, Zavoda za zdravstvenu zaštitu žena i materinstva i Zavoda za hitnu medicinsku pomoć. Sjednicu je vodila predsjedavajuća Općinskog vijeća Karolina Karačić, a osim vijećnika prisustvovali su predstavnici pomenutih zdravstvenih ustanova i članovi Zdravstvenog savjeta Općine Centar.

Uvodne napomene dao je Salko Pašović, vijećnik i predsjednik Zdravstvenog savjeta Općine Centar. Pri tome je kazao da Općina Centar, iako zdravstvo organizacijski i finansijski nije u njenoj nadležnosti, već dugi niz godina izdvaja značajna sredstva iz svog budžeta zdravstvenim ustanovama za unapređenje usluga građanima i poboljšanje zdravstvene zaštite stanovništva.

Kadrovska politika

Govoreći o aktuelnom stanju u zdravstvu Pašović je kao najveći problem istakao deficit medicinskog kadra prije svega ljekara, naročito pedijatar i ljekara porodične medicine, jer veliki broj njih odlazi u mirovinu, a istovremeno nije pravovremeno obezbijedena adekvatna kadrovska popunjenost. Stoga je iznio prijedlog Zdravstvenog savjeta da se kantonalnom Ministarstvu zdravstva uputi inicijativa da se kao privremeno rješenje produži rok za odlazak u mirovinu ljekarima za čije poslove nije obezbijeden novi kadar.

O problemu deficita medicinskih kadrova su na ovoj tematskoj sjednici govorili i vijećnici ističući da već godinama nema adekvatne kadrovske politike u zdravstvu i pravovremenog planiranja. S tim u vezi rečeno je da treba stvarati klimu da se takvo stanje popravi i profesiji vrati autonomija, te mladim kadrovima obezbijede bolji finansijski i drugi uvjeti kako bi se



zaustavio njihov odlazak.

Vijećnici su također ukazali na problem neravnomjerne pokrivenosti stanovništva uslugama porodične medicine po pojedinim mjesnim zajednicama u Centru, koji je neophodno što prije riješiti. Kad je riječ o mjerama i aktivnostima za poboljšanje zdravstvene zaštite, Zdravstveni savjet je predložio da se u cilju približavanja zdravstvene zaštite građanima u jednakom obimu uspostave i ambulante porodične medicine za mjesne zajednice Pionirska dolina i Nahorevo, kao i punkt hitne medicinske pomoći na području Centra koji bi pružao usluge za stanovnike općina Centar i Stari Grad. Također je predložio da se sačini dugoročni program uklanjanja azbestnih građevinskih materijala (krovovi, fasade, vodovodne cijevi) koji su štetni za zdravlje. Istaknut je i značaj preventivne zdravstvene zaštite stanovništva i edukacije u tom pogledu.

Raspored ambulanti

Načelnik dr. Nedžad Ajnadžić je naglasio da ova lokalna zajednica, u stalnom nastojanju da što više približi zdravstvenu zaštitu građanima u saradnji sa zdravstvenim ustanovama i institucijama, izdvaja na godišnjem nivou između 200.000 i 250.000 KM za nabavku medicinskih aparata, opreme i vozila za potrebe zdravstvenih ustanova u Sarajevu, ali i za pomoć drugim općinama u BiH gdje je povratnička populacija.

Također je kazao da je Općina uložila 250 hiljada maraka u kupovinu poslovnog prostora u objektu u Bolničkoj ulici gdje bi bila smještena ambulanta porodične medicine Višnjik.

Ajnadžić je istakao da Općina Centar nije zadovoljna rasporedom i organizacijom ambulanti porodične medicine na njenom području, s obzirom na to da je centru grada koncentrisano više zdravstvenih ustanova, dok to nije slučaj u padinskim dijelovima kao što su Nahorevo, Soukbunar, Pionirska dolina... S tim u vezi je dodao da Domovi zdravlja KS treba da uspostave adekvatan sistem održavanja infrastrukture, te da će im Općina Centar u tom smislu biti na raspolaganju.

Općinsko vijeće je usvojilo i nekoliko zaključaka. Tako je zatraženo od Ministarstva zdravstva KS, kao i pomenutih zdravstvenih ustanova da obezbijede adekvatnu kadrovska popunjenost svih organizacionih jedinica koje djeluju na području općine Centar i pravovremeno primanje ljekara i ostalog medicinskog osoblja te da se u apsolutnom obliku poštuje definisano radno vrijeme.

Općina će i u narednom periodu kroz razne projekte i aktivnosti davati podršku u partnerskom odnosu sa javnim zdravstvenim ustanovama i Ministarstvom zdravlja Kantona Sarajevo s ciljem unapređenja zdravlja i zdravstvene zaštite stanovnika općine Centar.



Karolina Karačić, predsjedavajuća Općinskog vijeća Centar

U prvoj polovini mandata Vijeće je odradilo ogroman posao



1. Od posljednjih lokalnih izbora u BiH prošlo je više od dvije godine. Molimo da date kratak osvrt na aktivnosti Općinskog vijeća na polovini mandata.

Želim da izrazim zadovoljstvo radom Općinskog vijeća Centar sada kad smo ušli u drugu polovinu mandata. Otkako je Općinsko vijeće Centar Sarajevo konstituisano, odnosno počelo sa radom, održali smo 31. redovnu sjednicu. Pored redovnih, Općinsko vijeće je održalo i šest tematskih, dvije vanredne, te sedam svečanih sjednica.

U navedenom periodu se razmatralo, raspravljalo i odlučivalo o preko 300 odluka, rješenja i izvještaja.

Smatram da smo svojim djelovanjem, raspravama i na kraju usvajanjem bitnih odluka doprinijeli da se na području Centra započnu i realizuju

veliki projekti od kojih su najviše koristi imali građani i šira društvena zajednica. Zadovoljna sam dosad urađenim, ali ne smatram da smo uradili sve što se od nas očekuje. Naprotiv, vjerujem da ćemo se svi još više angažovati i zajednički sa izvršnom vlasti još snažnije krenuti u realizaciju razvojnih projekata. Također, započete su aktivnosti oko izmjene Statuta Općine Centar koji nije mijenjan 14 godina. Iskreno se nadam da ćemo ovaj važni akt usvojiti u što skorije vrijeme.

2. Kada kažete da je Općinsko vijeće usvojilo bitne odluke od interesa za građane, na koje konkretno mislite?

Sve odluke koje usvaja Općinsko vijeće imaju svoju težinu i od svih građani imaju koristi. Neke od njih su vidljive na terenu kroz realizaciju projekata. Nabrojat ću samo neke poput podrške postavljanju termo fasada na objektima kolektivnog stanovanja, izgradnju objekta obdaništa „Razigrani dani“, stambeno zbrinjavanje mladih, ustanovljavanje Dana penzionera općine Centar, stipendiranje učenika i studenata, izgradnja škole na Šipu i zgrade za interno raseljene osobe, vodovod za Nahorevo, Nahorevska brda, Muharemoviće i Selje..., rekonstrukciju kosog lifta na Ciglanama, izgradnju Austrijske kuće, rekonstrukciju i sanaciju saobraćajnica, rekonstrukciju i modernizaciju Olimpijskog stadiona „Asim Ferhatović Hase“...

3. Kakva je saradnja sa parlamentarnim strankama koje participiraju u radu Vijeća?

U Općinskom vijeću Centar Sarajevo djeluje sedam klubova vijećnika. To je zapravo najveća prednost Općinskog vijeća Centar gdje svi vijećnici i politički subjekti daju svoj doprinos. Naše sjednice su uvijek konstruktivne i produktivne. Naravno, desi se da vijećnici imaju različite poglede na određene odluke, ali to je, za demokratsko društvo, sasvim normalna i uobičajena. Ponekad duže i burnije rasprave ne smijemo posmatrati nikako drugačije nego li pravo na suprotno mišljenje i slobodu iznošenja stavova. Saradnja sa parlamentarnim strankama je na zadovoljavajućem nivou, a obaveza rukovodstva Općinskog vijeća je da se odnosi i dalje unapređuju sve sa ciljem još produktivnijeg rada Vijeća.

4. Da li ste zadovoljni saradnjom sa predstavnicima izvršne vlasti Općine Centar na čelu sa načelnikom Ajnadžićem?

Saradnja predstavničke i izvršne vlasti Općine Centar prema mom mišljenju je jako dobra što potvrđuju i projekti koji su realizovani ili koji su u fazi realizacije na terenu. Predstavnici općinskih službi i načelnik Ajnadžić su uvijek na dispoziciji kada su sjednice Vijeća u pitanju i mogu reći da u većini situacija nađemo rješenje za određene probleme koji se pojave. Da su odnosi drugačiji i da ne radimo zajednički to bi se vidjelo na terenu, odnosno na projektima.





NUKO GREBOVIĆ:

□ Apelujem na uvažene vijećnike i vijećnice da podrže inicijativu za postavljanje spomen ploče za Slobodana Bodu Kovačevića, legendarnog kompozitora i gitaristu čuvene grupe Indexi. Općinsko vijeće je sa 23 (dvadeset tri) glasa ZA usvojilo ovu inicijativu i prosljeđuje je u redovnu proceduru.

□ Pokrećem inicijativu da se Spomen park Mirza Delibašić i Davorinu Popoviću, preko puta FIS-a, zagradi i zabrani ulazak kućnih ljubimaca.



SONJA AKŠAMIJA:

□ S obzirom da u MZ Bardakčije ne postoji niti jedan objekt koji je u funkciji predškolskog odgoja i obrazovanja, stanovnici godinama pokušavaju da vrate u funkciju obdanište koje je egzistiralo prije rata na ovom području. Prilikom anketiranja roditelji su iskazali potrebu da se u sklopu predškolske ustanove, koja im je neophodna, također organizira i produženi boravak za djecu koja pohađaju OŠ "Alija Nametak" koja se nalazi u neposrednoj blizini ovog obdaništa. Podnosim inicijativu da se Sigurna kuća, koja je smještena u dijelu zgrade, izmjesti na drugu, pogodniju lokaciju, a da se objektu vrati njegova nekadašnja namjena.

□ Koliko ima legalnih parkinga i koliko sredstava od njih dobivamo, a koliko ilegalnih parkinga i kako to pitanje riješiti?



AHMED GERIN:

□ Pokrećem inicijativu da se izvrši sanacija, odnosno popravak saobraćajnice u Ulici Himze Polovine koja je na više mjesta oštećena i gdje rupe predstavljaju ruglo i opasnost za učesnike u saobraćaju, kao i pješake.

□ U skladu sa članom 10. Statuta, pokrećem inicijativu za izmjene Zakona o socijalnoj zaštiti, zaštiti civilnih žrtava rata i zaštiti porodice sa djecom Kantona Sarajeva. Najme, ovaj zakon reguliše pravo na dječji dodatak. Članom 135. Zakona propisano je: Dječiji dodatak ne mogu ostvariti porodice u kojima je jedan od članova zajedničkog domaćinstva vlasnik preduzeća ili samostalne radnje ili ima registrovanu dopunsku djelatnost, vlasnik ili posjednik motornog vozila, osim ako su u pitanja osobe sa invaliditetom koje po propisima iz oblasti poreske i carinske politike mogu uvesti ili na domaćem tržištu kupiti motorno vozilo kao ortopedsko ili drugo pomagalo. Iz ove odredbe proizlazi da pravo na dječiji dodatak ne mogu ostvariti lica čiji član domaćinstva je vlasnik ili posjednik motornog vozila. Smatram da svako dijete koje ispunjava ostale uvjete iz Zakona, treba da ostvaruje pravo na dječiji dodatak, bez obzira da li su članovi domaćinstva vlasnici ili posjednici motornog vozila, ta da činjenica o vlasništvu ili posjedništvu motornog vozila ne treba biti eliminatorni kriterij za ostvarivanje tog prava.



TEA DREKOVIĆ:

□ Podnosim inicijativu u obliku urgencije za rješavanje problema parkinga za

stanare Tabašnice 2, 4 i 1. Klub vijećnika SBB traži da stanari ostvare ljudska i stanarska prava parkinga ispred svog stana. Saglasni su plaćati naknadu na godišnjem nivou za parking mjesta, koja im pripadaju. Stanari mole da se vrati znak samo za stanare jer je uklonjen i parking mjesta su zloupotrijebljena. Ono što stanari traže jeste da imaju obilježeno parking mjesto uz naknadu za korištenje u općini.

□ Sta se dešava sa poslovnim prostorima u naselju Breka u Ulici Ismeta Mujezinovića? Poslovni prostori stoje već duži vremenski period devastirani i prazni. Treba imati na umu da je tu igralište i da se djeca igraju, pa samim tim postoji mogućnost povrede mališana. Sta je sa tim prostorima i zbog čega nisu izdati i zašto stoje devastirani?



HARIS MUJANOVIĆ:

□ Podnosim inicijativu za dopunu Pravilnika o raspodjeli novčanih sredstava za dodjelu jednkrotnih novčanih pomoći porodiljama. Ovim Pravilnikom je u članu 4. stav 3 definisan iznos pripadajućih sredstava porodiljama za rođeno prvo, drugo, treće i četvrto i svako naredno rođeno dijete. Međutim, nije definirano šta je sa rođenjem blizanaća i pripadajućim sredstvima za ovu kategoriju novorođene djece; i ovdje mogu opet biti varijante kao što su blizanci prvorođena djeca ili pak ako se rode poslije prvog ili drugog djeteta. Predlažem da nadležna služba analizira ekonomske efekte ovih davanja shodno statističkim podacima i projekcijama i ponudi odgovarajući model ovog socijalnog davanja. Shodno tome da doradi član 4. ovog Pravilnika i ponudi OV-u na usvajanje dopunu Pravilnika.

□ Pokrećem inicijativu za preimenovanje ulice na području općine Centar u Ulicu Stephena Hawkinga. Zašto je bitan za Sarajevo i zašto inicijativa? Napad i opsadu Sarajeva uporedio je s minihenskim sastankom 1938. godine, nakon čega je uslijedio drugi svjetski rat. Tom prilikom je rekao: Napad na Sarajevo je okrutnost koja ne smije biti dopuštena u svijetu koji za sebe tvrdi da je civiliziran... Stephen Hawking kritizirao je, u najtežim vremenima za Sarajevo i Sarajlije svjetsku javnost i zapadne vlade zbog pasivnosti, šaljući pisma podrške građanima Sarajeva. S obzirom na globalnu i civilizacijsku vrijednost koju ime Stephen Hawking nosi, vijećnici SBB-a u Općinskom vijeću Centar, smatraju da jedna od centralnih gradskih ulica treba biti nazvana po tom velikanu.



SULEJMAN HALJEVAC:

□ Podnosim inicijativu da se lokalitet Hastahana nazove po profesoru Nijazu Durakoviću.

□ Katolički školski centar je podnio zahtjev kod Službe za prostorno uređenje i komunalne poslove za izmjenu Regulatornog plana Bjelave-Mejaš. Zahtjev se odnosi na rješavanje saobraćaja u mirovanju kroz izgradnju garaža, lokacija na Mejašu, zgrada Katoličkog školskog centra. Rješenje ovog problema je bitno, s obzirom da se nemaju gdje parkirati automobili korisnika ovog objekta, te parkirani automobili izvan dvorišta škole smetaju susjedima. Da bi riješili ovaj problem, neophodno je pristupiti donošenju Odluke o izmjeni Regulatornog plana, a u cilju stvaranja planskih preduvjeta za gradnju. Navedenim izmjenama neće se mijenjati osnovni koncept plana. Urgiram postupanje po navedenom zahtjevu.



DRAGAN STEVANOVIĆ:

□ Da li na području općine Centar ima ilegalnih imigranata, na kojim lokacijama su smješteni, da li su preduzete minimalne epidemiološke mjere i da li se na nivou Kantona Sarajevo dešavaju aktivnosti koje bi ovaj problem riješile na humani način?

□ Predlažem općinskom načelniku da se rebalansom budžeta za 2018. godinu planiraju sredstva za čišćenje, ograđivanje i zaštitu objekta Stare električne centrale na Marijin dvoru u saradnji sa Zavodom za zaštitu kulturno – historijskog i prirodnog naslijeđa i nadležnom službom, dok se ne definira taj lokalitet, ne konzervira i privede namjeni.

MIRO LAZOVIĆ:

□ Pokrećem inicijativu za rješavanje saobraćajne zagušenosti i problema na raskrsnici Tešanjska i Kranjčevićeva, odnosno izgradnju kružnog toka kako bi se rasteretio i omogućio sigurniji saobraćaj.

□ Apelujem na nadležnu službu da razmotri mogućnost postavljanja dječijeg igrališta na lokaciji iznad, odnosno uz objekat obdaništa



„Razigrani dani“. Obdanište bi trebalo imati vezu sa igralištem i biti osvijetljeno.



IGOR STOJANOVIĆ:

□ Podnosim inicijativu da se osvijetli Ulica Kromolj u kompletnoj dužini, kao i krakovi ulica koji još uvijek nemaju naziv, a nastavljaju se na ulicu Kromolj.

□ Podnosim Inicijativu za postavljanje 'ležećeg policajca' u Ulici Hasana Sušića kod broja 15. Tu se nalazi dječije igralište, a također i na garažama preko puta. Djeca trčeći za loptom ili iz drugih razloga često istrčavaju na vrlo prometnu ulicu. Ova inicijativa je takođe podnesena od strane građana MZ 'Breka-Koševo 2' u njihovoj mjesnoj zajednici.



BENJAMIN ISOVIĆ:

□ Iniciram postavljanje fiksne automatske stanice za praćenje kvaliteta zraka na području općine Centar Sarajevo. Za to je potrebno da se dodijeli zemljište. Građani općine Centar nemaju podatak kakav je kvalitet zraka koji udišu. Na potezu od Bašćaršije do Otoke ne postoji mjerna stanica za praćenje kvaliteta zraka. U Federalnom hidrometeorološkom zavodu na Bjelavama postoji visinska stanica za mjerenje kvaliteta zraka koja ne može mjeriti kvalitet i zagađenosti zraka na ovom potezu. Predlažem da se pokrene inicijativa prema Kantonu Sarajevo za dodjelu zemljišta i izgradnju fiksne stanice za nizinsko mjerenje kvaliteta zraka. Postavljanjem fiksne stanice moglo bi se preventivno djelovati i građani bi bili informirani kakav zrak udišu.

□ Predlažem da se u ulici Patriotske lige napravi propisna stajališna traka van kolovozne trake.

SEAD SRNA

□ Pokrećem inicijativu da općinski načelnik sa nadležnim pokuša riješiti problem gradskog saobraćaja na rubnim dijelovima općine Centar.

□ Na upit stanara zgrade u Ulici Hazima Sabanovića broj 6 u Sarajevu tražim odgovor o mogućnosti rješavanja parking prostora ispred ove zgrade.



Naime, ispred zgrade postoji parking prostor za stanare koji je često uzurpiran od strane drugih lica koji nisu stanari. Stanari su radi zaštite postavili metalnu rampu koja je po nalogu komunalnog inspektora Općine Centar uklonjena. Stoga tražim da mi odgovorite koji je način da stanari ove zgrade riješe ovaj problem s obzirom da stanari okolnih zgrada imaju postavljene kapije na pristupnom putu za njihove zgrade koje nisu uklonjene i ne predstavljaju problem.



DŽEVAD TOPIĆ

□ Ruševni objekti na području MZ Mejaš – Bjelave su veliki problem. Obratili su mi se građani sa zahtjevom da se na području mjesne zajednice nalaze objekti u ruševnom stanju koji prijete da se sami uruše. Postoji velika opasnost za građane tog područja. U tim objektima se skupljaju beskućnici i narkomani, tako da je bezbjednost građana ugrožena. Građani traže da se ti objekti sruše dok nije došlo do tragedije. Ulice u kojim se nalaze ti objekti su: Bjelave 5, Bjelave 7, Džemila Krvavca 6, Džemila Krvavca 13, Džemila Krvavca 15, Hadžihajdareva 1, Hadžihajdareva 4, Hadžisulejmenova 5, Hadžisulejmenova 13, Hadžisulejmenova 23, Hadžisulejmenova 30, Tahtali sokak 1, Tahtali sokak 3.

□ U krugu DIF-a se nalazi spomenik borcima. Podloga spomenika je jako loša, što zbog nebrige, što od zuba vremena. Predlažem da općinski načelnik pomogne u finansijskom smislu popravak podloge i slova na spomeniku.

**EDIN ABDURAHMANOVIĆ:**

□ Pokrećem inicijativu da nadležne službe riješe problem u Ulici Alipašina, preko puta Zetre, jer na tom području već duže vremena teče kanalizacija.

□ Predlažem da se riješi problem smetlišta na raskrsnici ulica Pehlivanuše i Hadžisulejmanove ulice. Napominjem, da je ulica jako frekventna i nalazi se u samom Centru grada, također u neposrednoj blizini se nalazi vjerski objekt, a najbitnija stvar zbog čega se navedeni problem treba riješiti je zdravlje građana.



□ U ime građana - džematlija džemata Panjina Kula podnosim inicijativu da se u toku izgradnje novoplanirane saobraćajnice Nedžada Mušića - Gornja Breka izgradi trg - park ispod džamije na samom završetku novoplanirane saobraćajnice, odnosno na spoju sa ulicom Nedžada Mušića. Inicijativu pokrećem uz potpisanu peticiju građana - džematlija džemata Panjina kula. Izgradnjom trga - parka Općina Centar će stanovnicima ovog područja omogućiti ostvarenje višedecenijske želje za uređenjem moderne MZ Hrastovi-Mrkovići i podići na viši nivo kvalitet življenja i ugodnog boravka na ovom području.



gradskog građevinskog zemljišta na lokalitetu pijaca Ciglane i Sirano dodijeljeno BOOC d.o.o. Sarajevo, pa podnosim inicijativu za donošenje Odluke o davanju na upravljanje gradskog građevinskog zemljišta na lokalitetu pijace Ciglane i Sirano privrednom društvu KJKP Tržnice-pijace d.o.o. Sarajevo koje već dugi niz godina uspješno i kvalitetno obavlja svoju djelatnost na 11 lokaliteta u Kantonu Sarajevo, uključujući i pijacu Ciglane koju kontinuirano koristi od 1990. godine. Općinsko vijeće je sa 24 glasa ZA usvojilo ovu inicijativu i prosljedilo je u dalju proceduru.

□ Pokrećem inicijativu da Općina Centar u okviru postojećeg budžeta izdvoji iznos od 10.000 do 15.000 KM i pomogne izgradnju igrališta za djecu u Srebrenici.

**DENIS CHALLENGER:**

□ Pokrećem inicijativu da se na području općine otvori Centar za pružanje komunalnih usluga, kako bi građanima omogućili plaćanje usluga bez provizije.

□ S obzirom da je izvjesno da kosi lift za koji je raspisan međunarodni tender neće proraditi ni za šest mjeseci predlažem da se uvede kombi linija sa Ciglana do gornjih dijelova zgrada naselja Ciglane ili da se angažira Sarajevo - taxi, kako bi se olakšali životni uvjeti građana naselja Ciglane.

MUSTAFA MULIĆ:

□ Pokrećem inicijativu u ime vijećnika koji stanuju na području MZ Hrastovi, a za koju su nas zadužili stanovnici Ulice 105. brigade da se izgradi kanalizacija u toj ulici i da to bude prioritet u planiranju rješavanja problema - izgradnje kanalizacije na području općine Centar u 2018. godini.

**VELIJA KATICA**

□ Povodom 25 godina od osnivanja Odreda policije za specijalne namjene 'LASTA', a na osnovu ratnih zasluga jedinice i poslijeratnog rada Udruženja veterana Odreda za specijalne namjene 'LASTA', pokrećem inicijativu za dodjelu imena 'Spomen park Lasta' - kod Arhitektonskog i Građevinskog fakulteta u Sarajevu. Inicijativa je prosljeđena Komisiji za javna priznanja i obilježavanje historijskih događaja i ličnosti Općine Centar.

□ U cilju podrške organizaciji EYOF 2019. godine u Sarajevu i Istočnom Sarajevu, molim da se Vijeće izjasni o finansijskoj i svim vidovima pomoći pri organizaciji ove najznačajnije manifestacije u gradu Sarajevu i BiH poslije zimske Olimpijade 1984. godine. Općinsko vijeće je sa 16 glasova ZA usvojilo ovu inicijativu i prosljeđuje je u dalju proceduru.

ABID JUSIĆ:

□ Općinsko vijeće je na 22. sjednici donijelo Odluku o prestanku važenja Odluke o davanju na upravljanje

**HAMDİJA HASANOVIĆ**

□ U ime građana naselja Sedrenik, Grdonj, Breka, Podhrastovi i Bardakčije podnosim inicijativu za izgradnju okretnice autobuske linije GRAS-a broj 14 iznad bolnice Podhrastovi u ulici Bardakčije. Izgradnjom okretnice ostvarile bi se tehničke pretpostavke za produžetak autobuske linije broj 14 što bi bitno uticalo na rješavanje gužve u minibusu koji saobraća na liniji Park-Sedrenik.

□ Pokrećem inicijativu za izgradnju pristupne staze iz pravca Slatina - Kromolj do parka na Betaniji. Općinsko vijeće je sa 27 glasova ZA usvojilo inicijativu za izgradnju pristupne staze iz pravca Slatina - Kromolj do parka na Betaniji.



SEJAD ĐOZO:

□ U ime građana Breke, pokrećem inicijativu za nabavku stomatološke stolice u ambulanti porodične medicine Breka. Postojeća stomatološka stolica je dotrajala i često se kvari, tako da građani moraju ići u privatne ordinacije i plaćati stomatološke usluge. Nabavka nove i zamjena postojeće dotrajale stomatološke stolice koštala bi oko 25.000 KM. Prihvatanjem i realizacijom ove inicijative riješili bi se problemi stanovnika koji se liječe u ambulanti Breka. Općinsko vijeće je sa 26 glasova ZA usvojilo ovu inicijativu i prosljedilo je u dalju proceduru.

□ Pokrećem inicijativu za otkup zemljišta kod OS "Vladislav Skarić" (ulica Terezija) radi izgradnje višenamjenskog sportskog igrališta namijenjenog djeci različitog uzrasta, a što je predviđeno Regulacionim planom "Podgaj-Tekija". Ovaj projekt je posebno značajan kada se uzme u obzir da na lijevoj obali Miljacke na ovom području ne postoji niti jedan takav teren ni sportska ploha. S obzirom da se u blizini ovog lokaliteta gradi novo stambeno naselje bilo bi neophodno da se planski postupi i izgradi ovo igralište, čime će se dati podsticaj djeci ovih naselja da se više bave sportskim aktivnostima. Općinsko vijeće je sa 24 glasa ZA usvojilo ovu inicijativu i prosljeđuje je u dalju proceduru.



EDIN MIROJEVIĆ:

□ U ime Udruženja Maloljetni borci odbrambenog oslobodilačkog rata 1992-1995. Općine Centar upućujem inicijativu za donošenje odluke o obilježavanju Dana maloljetnog borca Općine Centar - 5. novembra. Općinsko vijeće je sa 21 glasom ZA usvojilo inicijativu da se Dan maloljetnog borca Općine Centar obilježava 5. novembra.

□ Pokrećem inicijativu da se postave

nove dvije klupe i nova kanta za otpatke u malom parku u Odošašinoj ulici preko puta broja 72. Taj mali park, koji je na gornjem ulazu u Osnovnu školu "Hasan Kikić" koriste naši građani, roditelji i djeca.



SALKO PAŠOVIĆ:

□ Predlažem da Općinsko vijeće pokrene inicijativu prema Kantonu Sarajevo za otvaranje punkta dvadeset četiri sata hitne pomoći u ulici Jablanička. Općinsko vijeće je sa 18 glasova ZA usvojilo ovu inicijativu i putem nadležne službe prosljeđuje je u dalju proceduru.

□ Predlažem da Općina Centar putem nadležne službe uzme učešće na primjeren i adekvatan način u obilježavanju Dana učitelja - 5 oktobar. Također predlažem određene jubilarne nagrade za učitelje koji idu u penziju, te materijalne nagrade za nastavnike i učitelje koji su osvajali nagrade na sekcijским takmičenjima, a kriterije razraditi putem kolegijā direktora i u nadležnoj službi Općine Centar. Općinsko vijeće je sa 21 glasom ZA usvojilo ovu inicijativu i prosljeđuje je u redovnu proceduru.



SENADA BOSNO:

□ Predlažem da se jedan od trgova na području općine Centar imenuje po Tadeuszu Mazowieckom, poljskom piscu, novinaru, filantropu i političaru.

Svojim odnosom prema bosanskoj stvari i ratnim dešavanjima u našoj zemlji, Mazowiecki je zadužio građane ove zemlje te je kao takav proglašen počasnim građaninom Grada Sarajeva. Imenovanjem trga po Tadeuszu Mazowieckom ispunili bi našu obavezu da čuvamo sjećanje na velike prijatelje Bosne i Hercegovine. Općinsko vijeće je sa 23 glasa ZA usvojilo ovu inicijativu i

prosljeđuje je u dalju proceduru.

□ Pokrećem inicijativu da se Udruženju logoraša Općine Centar obezbijede sredstva za obilježavanja 19. juna - Dana logoraša Općine Centar. Minimum poštovanja za tu kategoriju naših sugrađana možemo iskazati na način da se aktivno uključimo u obilježavanje pomenutog datuma za koje treba obezbijediti minimalna sredstva iz budžeta Općine Centar. Općinsko vijeće je sa 19 glasova ZA usvojilo ovu inicijativu i prosljeđuje je u redovnu proceduru.



AMRA ALAJBEGOVIĆ:

□ Općinsko vijeće je sa 30 glasova ZA usvojilo inicijativu za uklanjanje dalekovodnog stuba u Ulici Abdurahmana Muharemije koji nije u funkciji i koji predstavlja veliku opasnost jer prijeti da se sruši zbog oštećenja.

□ Općinsko vijeće je sa 28 glasova ZA usvojilo inicijativu da se u Ulici Dežina Bikića kod Fordovog servisa postave ležeci policajci zbog bezbjednosti građana.



LEJLA KHATTAB:

□ Na prijedlog stanara iz Ulice Antuna Hangija broj 51-53 upućujem inicijativu za obnovu stepeništa i rukohvata na toj lokaciji. Stanari ističu da stepenište i rukohvati u Ulici Antuna Hangija 51-53 imaju velika oštećenja zbog čega je otežano kretanje osoba treće životne dobi koje su većinom tu nastanjene. Također, pred ovim stepeništem nalazi se i poluruševna niša za kontejnere koja ne služi svojoj svrsi, a u zimskim periodima je okupljalište pasa lutilica koji su u više navrata napadali stanare cijele navedene ulice.

□ Pokrećem inicijativu i predlažem općinskom načelniku da u skladu sa mogućnostima materijalno pomogne općinu Maglaj koja je i 2018. godine imala poplave.



AMRA ZULFIKARPAŠIĆ:

□ Pokrećem inicijativu da se na raskrsnici na Marijin Dvoru kod tržnog centra Alta izmijeni režim zelenog svjetla na semaforu tako da građani i automobili nemaju prolaz u isto vrijeme, a sve zbog sigurnosti pješaka, naročito zbog djece i učenika osnovnih škola, kao i ukidanje „city light-a“ kako bi se povećala vidljivost vozačima.

□ Predlažem da se sačini elaborat za osvjetljenje ulica na području općine Centar. Pokrećem inicijativu i za zamjenu postojećih sijalica koje osvjetljavaju naše ulice sa led rasvjetom?



AMELA KUSKUNOVIĆ:

□ U ime građana podnosim inicijativu za rekonstrukciju dijela Ulice Abdurahmana Muharemiće kod broja 43 zbog neadekvatne rekonstrukcije saobraćajnice. U više navrata građani su se obraćali Općini Centar i medijima, međutim reakcija je izostala.

□ Za izgradnju vodovoda Nahorevo probijena su planirana sredstva i sada ima problem sa vodom, kontrolom vode, VIK ne želi vršiti kontrolu vode. Predložila je, a Općinsko vijeće je sa 20 glasova ZA prihvatilo inicijativu za hitno održavanje tematske sjednice kako bi se utvrdilo šta dalje raditi.

NIHAD UK:

□ Iniciram da se u skladu sa predviđenom procedurom pristupi imenovanju neke od ulica na prostoru općine Centar po jednom od najvećih bosanskohercegovačkih pjesnika Izetu Sarajliću koji je promovirao najbolje vrijednosti ovog grada, njegovu antifašističku opredijeljenost, postavši jedan od simbola Sarajeva u svjetskim okvirima. Mislim da bi bilo vrijeme da petnaest godina nakon

njegove smrti i ovaj grad uzvratil pjesniku dajući njegovo ime jednoj ulici na području naše općine u kojoj je živio i stvarao.

□ Općinsko vijeće je sa 20 glasova ZA usvojilo inicijativu za davanje na korištenje dva općinska stana, dok postoji potreba, djeci koja su navršila 18 godina života i trenutno borave u Domu za djecu bez roditeljskog staranja. Naime, Dom za djecu bez roditeljskog staranja prima na smještaj




i zaštitu djecu od rođenja do navršanih 18 godina života. Ukoliko se ocjeni da postoje opravdani razlozi, na prijedlog Doma za djecu, Centar za socijalni rad može djetetu produžiti smještaj u Domu za djecu bez roditeljskog staranja i nakon 18 godine života, a najviše do navršanih 27 godina.



SAMIR FAZLIĆ:

□ U cilju rješavanja problema Osnovne škole „Silvije Strahimir Kranjčević“ predlažem zaključak koji glasi: Općinsko vijeće Centar se strateški opredjeljuje za nesmetan rad O.Š. „Silvije Strahimir Kranjčević“ u objektu Saveza izviđača Kantona Sarajevo, dok se ne utvrdi da li je Savez izviđača Kantona Sarajevo stvarni vlasnik.

□ Na zahtjev građana iz Ulice Tina Ujevića 5, molimo da inspekcija utvrdi pravo stanje i predloži rješenje problema klizišta. Postoji nalaz od strane Fuada Babića o lošem stanju terena na kojem se nalazi zgrada. Drenaža, kanalizacija, stepenice kao i prolaz gdje se svakodnevno parkiraju automobili stvaraju problem građanima, i konstantno dolazi do slabljenja stabilnosti zgrade. Veoma je bitno da se zabrani pristup autima koji ugrožavaju i pristup građanima koji žive u ovoj stambenoj zgradi.



LAMIJA TIRO:

□ U Ulici Odobašina na broju 56 nalazi se ruševan objekat koji godinama niko ne koristi. Inicijativu upućujem nadležnim službama da preispitaju da li je objekat u privatnom vlasništvu, da li je u evidenciji devastiranih i ruševnih objekata i da se poduzmu koraci kako bi se spriječilo eventualno obrušavanje jer se objekat nalazi u blizini OS „Hasan Kikić“ i učenici svakodnevno prolaze pored ovog objekta.

□ Podnosim inicijativu da se uputi u dalju proceduru i višim organima za postavljanje zvučne signalizacije na semaforima duž Ulice Maršala Tita zbog lakšeg kretanja u saobraćaju osobama sa invaliditetom.




ANTON RAJIĆ:

□ Pokrećem inicijativu da se postave ležeći policajci u Ulici Pehlivanuša kod broja 3 i 40, s obzirom da se na tom lokalitetu nalazi dječje obdanište, a zbog brze vožnje nesavjesnih vozača, uske ulice i direktnog istrčavanja djece na ulicu, molim da se pod hitno pristupi realizaciji ove inicijative kako bi se smanjila mogućnost nesreće sa nesagledivim posljedicama.

□ Moje pitanje se odnosi na provedeni pregovarački postupak za dodatne radove na objektu škole na Sipu. Da napomenem da je iznos dodatnih radova 311.313,65 KM sa PDV om. Kao razlog je navedeno da nije dobro urađen geološki nalaz zemljišta i da je konstatovano da kota geološkog terena ne odgovara koti iz geološkog izvještaja, što je ustanovljeno prilikom izvođenja radova. Dakle, u pitanju je greška projektanta. Zato tražim na uvid sve ugovore za izradu projekta i za izvođenje radova.

1500 učesnika iz 50 evropskih država

Općina Centar snažno podržava održavanje EYOF-a



Omladinski olimpijski festival (EYOF) koji će se u februaru naredne godine održati u Sarajevu i Istočnom Sarajevu zasigurno je najveći sportski događaj u našoj domovini nakon Zimskih olimpijskih igara 1984. EYOF će, kako se očekuje, okupiti više od 1.500 učesnika iz oko 50 evropskih država koji će se natjecati u zimskim sportovima na nekoliko borilišta u Sarajevu i Istočnom Sarajevu.

Organizacioni odbor donio je odluku da se otvaranje ovog velikog sportskog događaja održi na Olimpijskom stadionu „Asim Ferhatović Hase“, a zatvaranje na stadionu Slavije u Lukavici. Na otvaranju manifestacije između ostalog, ponovo će biti upaljen Olimpijski plamen.

Akcija čišćenja

S obzirom da je vlasnik Olimpijskog stadiona, Općina Centar kao odgovorna lokalna zajednica, uzela je aktivno učešće u organizaciji ovog velikog sportskog događaja koji će našu domovinu i njene prirodne ljepote promovirati u svijetu.

U proteklom periodu održane su akcije čišćenja i uređenja stadiona, a sve u cilju stvaranja što boljih uslova za održavanje svečane ceremonije na kojoj će prisustvovati desetine hiljada posjetilaca.

Općina Centar je u ovoj godini uložila značajna sredstva za modernizaciju stadiona. Završeno je uspostavljanje centralne sobe za upravljanje sistemom sigurnosti, kao i pojačanje reflektorske rasvjete. Pored toga, završena je dogradnja klupe za stručne timove i rezervne igrače, te prostor za zagrijavanje igrača. Postavljen je novi rezultatski semafor, a provodi se i procedura za ugradnju novih stolica u VIP loži.

Posljednja aktivnost koja je provedena u okviru uređenja stadiona



je testiranje obnovljenog plamenika u kojem će ponovo gorjeti Olimpijski plamen nakon 34 godine. Paljenje Olimpijskog plamena zasigurno će evocirati uspomene na Zimske olimpijske igre održane u Sarajevu 1984. godine.

Modernizacija stadiona

Načelnik Općine Centar dr. Nedžad Ajnadžić organizovao je obilazak stadiona na Koševu 30. novembra kako bi se uvjerali da se radovi prije otvaranja EYOF-a odvijaju prema utvrđenoj dinamici. Obilasku su prisustvovali gradonačelnik Sarajeva Abdulah Skaka, dopredsjedavajuća Gradskog vijeća Edina Gabela, dopredsjedavajući Općinskog vijeća Centar Mustafa Mulić i Sulejman Haljevac, vijećnica Senada Bosno te predstavnici tima zaduženog za ceremoniju otvaranja EYOF-a, Centra za sport i rekreaciju i Fudbalskog kluba Sarajevo.

-Ozbiljno smo shvatili našu misiju uređenja stadiona pred ovaj sportski događaj jako važan za grad, našu lokalnu zajednicu i Bosnu i

Hercegovinu. Općina Centar zajedno sa JU Centar za sport i rekreaciju čiji smo osnivač i koja upravlja stadionom na Koševu organizatorima stoje na raspolaganju. Podržat ćemo u punom kapacitetu održavanje EYOF-a jer smo svjesni njegovog značaja za Bosnu i Hercegovinu. U uređenje i modernizaciju stadiona smo do sada zajedno sa Vladom KS uložili oko 1.100.000 KM, istakao je načelnik Ajnadžić.



Akcija čišćenja Olimpijskog stadiona na Koševu



Predvođeni načelnikom Ajnadžićem volonteri iz Osnovne škole „Nafija Sarajlić“ i Druge gimnazije, članovi Općinskog i mjesnih štabova civilne zaštite, nekoliko mjesnih zajednica Centra, predstavnici uprave i omladinskog pogona FK Sarajevo, kao i uposlenici KJKP „Park“ su 3. decembra učestvovali u velikoj akciji čišćenja i uređenja Olimpijskog stadiona „Asim Ferhatović Hase“ na Koševu.

Povod eko akcije u organizaciji Općine Centar i Centra za sport i rekreaciju je svečano otvorenje Evropskog olimpijskog festivala mladih (EYOF) u februaru 2019. godine na ovom stadionu.

Načelnik Ajnadžić je kazao da su uređenje i modernizacija stadiona Koševo započeli mnogo prije i da ova ekološka akcija predstavlja nastavak aktivnosti Općine Centar na pripremi stadiona za svečano otvorenje EYOF-a i odigravanje međunarodnih utakmica.

–Zahvalan sam onima koji su se odazvali na akciju uređenja stadiona posebno osnovcima i srednjoškolcima. Ova eko akcija predstavlja završnicu naših napora da stvorimo dobre uvjete za održavanje centralne manifestacije otvaranja EYOF-a, objasnio je Ajnadžić.

Učenicima škole „Nafija Sarajlić“ Iman Selanović i Muhamed Efendić koji su se priključili akciji čišćenja stadiona su kazali da je ovo njihov mali doprinos pred održavanje Evropskog olimpijskog festivala mladih i da se dobro zabavljaju kroz druženje sa vršnjacima uređujući stadion na kojem je nakon posljednje utakmice ostalo dosta smeća. Ovaj stadion kao i sve druge sportske objekte trebamo čuvati i održavati zbog svih koji žele da dolaze na sportske manifestacije, poručili su osnovci.

Preko 40 učesnika utrke

Održan drugi „Bike Fest“ u gradskom parku Jezero



I pored loših vremenskih prilika, u gradskom parku Jezero u nedjelju, 21. oktobra je održan drugi po redu „Bike Fest“ na kojem su mališani uzrasta od 8 do 14 godina učestvovali u biciklističkoj utrci u parku, te u takmičenju na poligonu. Manifestaciju su uz podršku Općine Centar organizovali Centar za sport i rekreaciju i Klub brdskog biciklizma „Puls“.

Utrka je organizovana u dvije kategorije i za najbolje su

Ibišević. U starijoj kategoriji djece od 12 do 14 godina najbolji je bio Hamza Said Šahinović, drugo mjesto je osvojio Rijad Pleho, a treće Anes Ljubušić.

–Danas smo imali oko 40 učesnika utrke i vještine na poligonu i izuzetno smo zadovoljni održanom manifestacijom.. Djeca su danas imala priliku da dožive i vide kako izgleda prava biciklistička utrka. Naredne godine planiramo ovo takmičenje podići na veći nivo. U



obezbjede simbolične nagrade koje je u ime načelnika uručila Jasmina Fazlić, pomoćnica za boračko-invalidsku zaštitu, socijalna pitanja i društvene djelatnosti.

Nakon prijave učesnika prvo je na parking u između stadiona Koševo i parka Jezero održano takmičenje spretnosti na poligonu gdje je najbolji bio Hamza Said Šahinović.

Nakon toga je organizovana utrka za djecu od 8 do 11 godina gdje je prvo mjesto osvojio Emel Ljubuškić, drugo Emrah Ljubuškić, a treće Armin

planu je i cilj nam je da pravimo prave biciklističke utrke za djecu kao u zemljama regije, kako bismo još više afirmisali ovaj sport u Sarajevu, kazao je Amar Njemčević iz Kluba brdskog biciklizma „Puls“.

„Bike fest“ je također podržala i Lejla Tanović, najbolja biciklistkinja naše države, dok su pripadnici DVD „Bjelave“, Službe hitne pomoći te Druge policijske uprave-Policijske stanice Centar omogućili da manifestacija prođe u najboljem redu.

Trg koji bi trebao biti preimenovan u Trg kulture Jurislav Korenić

Uređen plato ispred Pozorišta mladih



Premijer Kantona Sarajevo Adem Zolj, gradonačelnik Abdulah Skaka i načelnik Općine Centar dr. Nedžad Ajnadžić su 6. novembra ozvaničili završetak radova na uređenju trga ispred Pozorišta mladih i predali ga na upotrebu našim sugrađanima. Projekt uređenja ovog trga koji bi na osnovu inicijative Općine Centar trebao biti preimenovan u Trg kulture Jurislav Korenić u čast velikog pozorišnog i tv reditelja, osnivača Pozorišta mladih, Kamernog teatra 55 i Festivala MESS, je finansirala Općina Centar.

-Ovo je mali poklon našem gradu i građanima i bit ćemo odlučni da pravimo što više parkova, sadimo što više drveća i pravimo zelene zone. Jako sam zadovoljan da smo uz veliku borbu i puno napora napravili ovaj park „Put života“. Naš naredni korak je da povežemo ovaj trg sa onim ispred Narodnog pozorišta, čime želimo napraviti najveći trg u Sarajevu, kazao je načelnik Ajnadžić.

Nakon što je rješenjem Ministarstva saobraćaja Kantona Sarajevo uklonjen javni parking sa ovog prostora radnici građevinske firme „Grakop“ su izveli zanatsko-građevinske radove i asfaltiranje na dijelu trga površine 700 metara kvadratnih.

-Vlada Kantona Sarajevo je prihvatila inicijativu načelnika Općine Centar da se ovaj prostor uredi kao trg i stoga smo pronašli zamjensku lokaciju za novi parking na Marijin Dvoru. Divno je imati u samom centru grada ovakvu malu oazu gdje želimo postaviti skulpturu posvećenu Jurislavu Koreniću, objasnio je premijer Zolj.

Za hortikulturno uređenje trga u Kulovića ulici bilo je zaduženo Kantonalno javno komunalno preduzeće „Park“. Na zelenoj površini

od 400 metara kvadratnih postavljena je zemlja i travnato busenje. Također je postavljeno i sedam velikih žardinjera u koje su zasađene sadnice niskih stabala zajedno sa sezonskim ukrasnim cvijećem, deset parkovskih klupa za odmor te četiri korpe za otpatke. Idejno rješenje uređenja trga ispred Pozorišta mladih (pod nazivom „Via Vitae“ -

odmor naših sugrađana, također služiti i za igru i druženje, kao i za organizovanje umjetničkih performansa ili nekih drugih vidova zabave i edukacije. Tokom obnove ovog trga također se vodilo računa o slijepim i slabovidnim licima za čije je nesmetano kretanje napravljena vodilica od Kulovića ulice do Pozorišta mladih.



Put života) je uradio student četvrtne godine Akademije likovnih umjetnosti – Odsjeka za grafički dizajn Ahmet Prošić.

-Nevjerovatan je osjećaj znati da sam dao doprinos kulturi, mada su svi govorili da je nemoguće da umjesto javnog parkinga bude ovakva zelena površina, kazao je Prošić.

Uređen prostor na trgu sada će, osim za

Druženju povodom završetka uređenja trga prisustvovali su i Izudin Bajrović, direktor Narodnog pozorišta u Sarajevu, predstavnici KJKP „Park“, Centra kulture i mladih, Pozorišta mladih, Akademije likovnih umjetnosti, Muzeja književnosti i pozorišne umjetnosti BiH koji su ustupili kolekciju fotografija i plakata iz svog fondusa za mini izložbu u čast Jurislava Koreniću.

Do 2020. godine funkcionalni objekat na 2.000 m²

Počelo zidanje vrtića „Razigrani dani“

Općinski načelnik dr. Nedžad Ajnadžić obišao je gradilište u Ulici Patriotske lige gdje je u toku izgradnja objekta u kojem će biti smješteno obdanište „Razigrani dani“. O dinamici radova načelnika je informisao Emir Muftić, šef gradilišta firme „Unigradnja“ koja izvodi radove, i naglasio da je u toku je izgradnja betonske konstrukcije i zidanje.

-Danas smo se uvjerali da se izgradnja objekta novog obdaništa izvodi planiranom dinamikom. Ukoliko bude sve po planu nadam se da ćemo do kraja iduće godine, eventualno najkasnije do prvog kvartala 2020. godine, imati funkcionalan objekat površine od oko 2.000 metara kvadratnih u kojem će boraviti najmlađa i najstarija populacija, te ćemo imati prostora za ostale društvene aktivnosti, objasnio je načelnik Ajnadžić.

Nakon izvedenih zemljanih radova obezbijedena je građevinska jama sa ciljem da se prevenira bilo kakvo pomjeranje tla. To se postiglo ugradnjom 56 armirano-betonskih šipova, za šta je Općina izdvojila 330.000 KM, dok će cjelokupna vrijednost izgradnje novog objekta koštati oko tri miliona KM, a sredstva će također obezbijediti Općina Centar.

Obilasku građevinskih radova je prisustvovao i Ekrem Kurtović, stanovnik Mjesne zajednice „Koševo II“ koji je kazao da su presretni izgradnjom novog objekta.

-Zahvaljujući Općini i načelniku Ajnadžiću ovaj dio grada je već počeo da poprima malo kvalitetnije uslove za život. Tokom proteklog rata uništen je nekadašnji objekat



obdaništa „Razigrani dani“ pa ovo naselje nije imalo obdaništa što je stanovnicima predstavljalo veliki problem. Sada smo svjedoci povećane potražnje stanova od strane mladih parova koji žele živjeti na ovom području, jer osim budućeg objekta obdaništa također u blizini imamo osnovnu školu čime imamo dobre uslove za cjelodnevi boravak njihove djece, kazao je Kurtović.

Pomenuti radovi predstavljaju drugu fazu projekta izgradnje objekta obdaništa „Razigrani dani“. U prvoj fazi je u septembru prošle godine uklonjen stari devastirani objekat koji je služio kao divlja deponija smeća i okupljalište narkomana.

Kako je predvidio glavni projekat dimenzije i pozicija nekadašnjeg objekta biće zadržane. U objektu korisne površine oko 2.000 metara kvadratnih, osim obdaništa, također će biti smješten i Centar za zdravo starenje, te drugi društveni sadržaji. Novina je izgradnja skloništa, što nalažu zakonski propisi, koji nije imao stari objekat. Uz izgradnju objekta planirano je i vanjsko uređenje koje predviđa parkovski mobilijar i igralište.

Utopljavanje nebodera u Ulici Patriotske lige 38



U okviru projekta utopljanja stambenih zgrada na području Centra u toku su radovi na postavljanju nove termo fasade na neboderu u ulici Patriotske lige 38 koji su počeli u septembru. Ukupna vrijednost projekta je oko 270.000 KM od čega Općina Centar i Ministarstvo prostornog uređenja, građenja i zaštite okoliša Kantona Sarajevo izdvajaju iznos od 200.000 KM, dok su ostatak sredstava obezbijedili stanari. Načelnik Ajnadžić je obišao lokaciju gdje se uvjerio u dobru dinamiku radova.

-Moram izraziti zadovoljstvo što projekt ide predviđenom dinamikom i još veće mi je zadovoljstvo zbog toga što općinska administracija radi zajednički u saradnji sa svim stanarima u ovoj zgradi. Pored budžetskih sredstava stanari su sami izdvojili dio sredstava za utopljanje objekta čime su pokazali društvenu odgovornost. Na ovom objektu, osim povećanja energetske efikasnosti, skidamo azbestne ploče koje su opasne za zdravlje. Imamo ambiciju da u idućoj godini intenzivnije angažujemo građane iz preostalih solitera Ulice Patriotske lige kao i iz solitera u Jukićevoj ulici, te ih stoga pozivamo da učestvuju u ovom projektu za dobrobit njih samih i naše zajednice, objasnio je Ajnadžić.

-Nisam vjerovao da ćemo dočekati dan kada ćemo imati fasadu na našoj zgradi visokoj 46 metara sa 77 stambenih jedinica i 164 stanara od kojih su 60 posto penzioneri. Nije bio nimalo lak zadatak, ali profesionalnošću angažovane firme sve je proteklo bez ijedne neželjene situacije, kazao je Dino Kapo, predstavnik stanara nebodera u Ulici Patriotske lige 38.

Tokom prošle godine kada je pokrenut projekat utopljanja stambenih zgrada u Centru postavljene su termo fasade na šest objekata: Bolnička 50, Kaptol 28, Kalemova 38, Franca Lehara 13, Derebent 24-26 i Branilaca Sarajeva 4, za šta je Općina Centar izdvojila 110.185 KM, a ove godine i na neboderu u Ulici Jezero 5.





Zahvaljujući povoljnim vremenskim uslovima radnici građevinske firme „Grakop“ su okončali realizaciju druge faze projekta sanacije dijela Ulice Armije RBiH na Kromolju). Finansijer projekta je Općina Centar koja je za ovu namjenu izdvojila 100.730 KM, dok je za nadzor zadužena firma „Energoinvest“ d.d. Sarajevo.

Na osnovu elaborata sanacije dijela pomenute ulice, u dužini od 270 metara, koji je uradila projektantska firma „Saraj inženjering“, prvo je mašinski uklonjen stari oštećeni asfalt i tampon. Postavljena je nova kamena frakcija i ugrađeno je 420 metara novih betonskih ivičnjaka. Odvodnja površinskih voda je riješena izgradnjom kanala za drenažu te ugradnjom pet novih uličnih slivnika koji su sa 210 metara plastičnih cijevi spojeni na gradsku odvodnu mrežu. Na kraju radova postavljeno je 1.240 kvadratnih metara novog asfalta.

U toku druga faza izgradnje vodovoda Nahorevo



Radovi druge faze izgradnje sistema za vodosnabdijevanje naselja Nahorevo, Nahorevska brda, Muharemovići i Selja se odvijaju planiranom dinamikom. Projekt finansira Općina Centar, a izvođač radova je građevinska firma „Mibrat“.

Vrijednost ove faze projekta je 418.000 KM i prema glavnom projektu, kojeg je uradio Institut za hidrotehniku Građevinskog fakulteta u Sarajevu, dužina trase novog distributivnog cjevovoda će iznositi 4.528 metara. Radovi su krenuli od postojećeg rezervoara na Nahorevskim brdima prema naselju Muharemovići. Nakon postavljanja distributivnog cjevovoda slijedi priključenje oko 100 stambenih objekata na novu vodovodnu mrežu. Obaveza izvođača radova je da deset metara od distributivnog cjevovoda iskopa trasu i položi cijevi za priključak domaćinstava, dok će obaveza vlasnika objekta biti izgradnja šahta odgovarajućih dimenzija i postavljanje novog vodomjera u okviru vlasničke parcele, te sprovođenje vodovodnih cijevi do svog stambenog objekta.

Prilikom obilaska lokacije gdje se izvode radovi načelnik Ajnadžić je razgovarao sa lokalnim stanovništvom o ovom projektu.

-Ovo je važan infrastrukturni projekat i za lokalnu zajednicu, a prije svega za

stanovnike ovih naselja. Naš plan je sva domaćinstva priključiti na distributivnu mrežu, a nadam se da ćemo u narednoj, odnosno trećoj fazi započeti izgradnju još jednog velikog rezervoara kapaciteta 250 hiljada litara. Vode ima sasvim dovoljno da se obuhvate sva domaćinstva, istakao je načelnik.

Munib Pandžić, stanovnik Nahoreva se zahvalio načelniku i Općinskom vijeću Centar na urađenom poslu.

-U posljednje vrijeme puno se uradilo na ovom mjesnom području. Fokus je stavljen na prioritete probleme. Najvažnije je da svi stanovnici dobiju priključak za vodu, jer to su egzistencijalna pitanja za sve nas, kazao je Pandžić.

Podsjećamo, Općina Centar je finansirala i prvu fazu izgradnje vodovoda za vodosnabdijevanje naselja Nahorevo, Nahorevska brda, Muharemovići i Selja sa izvorišta Klanice. Riječ je o najvećem projektu komunalne infrastrukture realiziranom na području općine Centar u posljednjih 20 godina, a vrijednost je više od dva miliona maraka.

Dužina transportnog i distributivnih vodova iznosi preko 16 kilometara, a kapacitet izgrađenog rezervoara je 250 hiljada litara.

Završena sanacija Ulice Asima Ferhatovića

Radnici građevinske firme „Bosman“ su prije pogoršanja vremenskih prilika okončali radove na sanaciji Ulice Asima Ferhatovića koje je finansirala Općina Centar sa 280.150 KM.

Prilikom obilaska navedene lokacije po završetku radova načelnik dr. Nedžad Ajnadžić je kazao: -Kao što smo i obećali, uz punu saradnju Savjeta Mjesne zajednice „Koševo II“ i građana sa ovog područja, uspjeli smo sanirati saobraćajnicu cijelom njenom dužinom. Sredstvima iz budžeta Općine Centar na ovoj ulici, ukupne dužine oko 410 metara, postavljen je novi asfalt i kolovozna konstrukcija, te novi slivnici za odvod površinskih voda. Tokom izvođenja radova duž ulice Asima Ferhatovića uklonjen je stari oštećeni asfalt i kolovozna konstrukcija, te je postavljen donji noseći tamponski sloj od drobljenog kamenog materijala debljine 40 centimetara. Za adekvatnu odvodnju površinskih voda urađena je nivelacija deset šibera za vodu, 36 šahtova i 15 slivničkih rešetki. Na kraju radova je postavljeno gotovo 4.000 metara kvadratnih novog asfalta, nakon čega je iscrtana horizontalna signalizacija i postavljene znakove vertikalne saobraćajne signalizacije.



Općina uložila više od 300.000 KM

Završeni radovi u Kemal-begovoj ulici

Početak decembra završeni su radovi u Kemal-begovoj ulici, dužine 170 metara, koja je smještena između Alipašine i Koševo ulice, a projekt je finansirala Općina Centar sa oko 400.000 konvertibilnih maraka.

Prvo je urađena kompletna rekonstrukcija vodovodne i kanalizacione mreže, a zatim asfaltiranje kolovoza i pločnika.

Tokom realizacije ovog projekta radnici „Vodovoda i kanalizacije“ su zamijenili cijevi potisnog i distributivnog vodovodnog cjevovoda, te fekalne i oborinske kanalizacije, nakon čega su obavili testiranje, čišćenje i dezinfekciju nove vodovodne mreže. Dok su trajali radovi uspostavljen je privremeni cjevovod za snabdijevanje vodom okolnih objekata, a prema rješenju Ministarstva saobraćaja Kantona Sarajevo na snazi je bio izmijenjeni režim saobraćaja.

Po završetku rekonstrukcije vodovoda i kanalizacije, u što je Općina uložila više od 300.000 KM, radnici građevinske firme „Mibral“ su uklonili stare ivičnjake i trotoare, nakon čega su postavili novu podlogu duž saobraćajnice i trotoara, kao i nove betonske ivičnjake, a zatim su izvršili asfaltiranje ulice zajedno sa pločnicima.

Povodom završetka radova načelnik Ajnadžić je zajedno



sa predstavnikom firme „Energoinvest“ zadužene za nadzor obišao ovu lokaciju kako bi se uvjerio u kvalitet izvedenih radova.

„Želim našim sugrađanima uputiti izvinjenje što su radovi trajali duže nego što je planirano, ali to se desilo zbog velikog obima posla. Uvjeren sam da je ovo dobar projekat koji je realizovan u interesu građana, kazao je načelnik.



Novi asfalt u Ulici Skenderija

Krajem novembra završena je sanacija i asfaltiranje Ulice Skenderija u centru grada. Uzimajući u obzir značaj i stanje u kojem se nalazila ova saobraćajnica, Općina Centar je u saradnji sa Direkcijom za ceste Kantona Sarajevo, obezbijedila sredstva u ukupnom iznosu 145.000 KM za sanaciju kolovozne konstrukcije.

Radovi su započeli 8. oktobra, a za izvođača je angažovana firma „Grakop“ koja je u predviđenom roku pripremila saobraćajnicu za asfaltiranje. Međutim, u toku izvođenja radova predstavnici Akademije scenskih umjetnosti su

se obratili sa zahtjevom za izgradnju uslovljenog cjevovoda kanalizacione mreže u dužini od oko 130 metara, kako bi se novi objekat ove institucije kulture mogao priključiti na separatu kanalizacionu mrežu.

S obzirom da se radi o centru grada i na frekvenciju javnog saobraćaja resorno kantonalno ministarstvo je ranije odobrilo izvođenje navedenih radova samo u noćnim satima. Radi ubrzanja realizacije poslova, a na zahtjev Općine Centar, Ministarstvo saobraćaja Kantona Sarajevo izdalo je dozvolu o potpunoj, cjelodnevnoj

obustavi saobraćaja u trajanju od pet dana u kontinuitetu, kako bi izvođač radova firma „Unigradnja“, uz nadzor Zavoda za izgradnju KS, intenzivnim danonoćnim radom ovaj projekt realizirao prije većih zimskih padavina. U skladu sa građevinskim normama, a za vrijeme trajanja potpune obustave saobraćaja, izvršeno je polaganje asfaltne podloge kako bi se omogućio nesmetan saobraćaj. Do sredine decembra je okončana i sanacija trotoara, dok će završni sloj asfalta biti urađen početkom sljedeće građevinske sezone.



**OD 1. DO 31. JANUARA
BESPLATNO KLIZANJE**

Otvoren osmi Coca-Cola Sarajevo Holiday Market

U prisustvu velikog broja građana, te predstavnika Grada Sarajeva i Općine Centar, paljenjem lampica na bogato ukrašenoj jelki u parku Hastahana na Marijin Dvoru u večernjim satima 5. decembra je svečano otvoren osmi Coca-Cola Sarajevo Holiday Market.

Najveseliji sarajevski zimski događaj Coca-Cola Sarajevo Holiday Market će se dešavati u parku Hastahana, odnosno „Parku prof. dr. Nijaza Durakovića“ i to u vremenu od 5. decembra 2018. godine do 13. januara 2019. godine, a u tom periodu Sarajlije će zajedno proslaviti sve praznike koji se slave krajem jedne i početkom druge godine.

Coca-Cola Sarajevo Holiday market ponudit će i ove godine bogat sadržaj koji ima cilj upotpuniti prazničnu sezonu i zimsku bajku u središtu glavnoga grada Bosne i Hercegovine, koja će biti atrakcija za građane i posjetitelje Sarajeva.

Među ponuđenim sadržajima ponovno će biti i ledena ploha, a besplatne termine za klizanje naših sugrađana u periodu od 1. do 31. januara 2019. godine je obezbijedila Općina Centar.

Načelnik Općine Centar dr. Nedžad Ajnadžić je u svom obraćanju prisutnima kazao je da je Općina Centar u želji da poboljša turističku ponudu, ali i da svojim građanima obezbijedi ugodniji ambijent za predstojeće praznike, odlučila da i ove godine pomogne organizaciju Coca-Cola

Holiday Marketa.

-Općina Centar i ove godine želi prazničnu atmosferu prenijeti na ulice grada i na taj način pozvati naše sugrađane da izađu iz svojih domova, ali i turiste da se druže. Okitili smo glavne ulice grada kako bi praznična atmosfera bila upečatljivija. Coca-Cola Holiday Market je primjer uspješne saradnje vladinog i nevladinog sektora. Svi posjetitelji na ovom prostoru mogu pronaći nešto za sebe, a Općina Centar je i ove godine najmlađim stanovnicima obezbijedila besplatne termine za klizanje, istakao je Ajnadžić.

Osim praznične atmosfere, sve generacije posjetilaca će u narednih 39 dana pronaći nešto za sebe. Od originalnih proizvoda koji su izloženi u postavljenim kućicama na marketu do lunaparka, ranča za ponije, te Coca-Cola selo Djeda Mraza obogaćeno 3D vizualizacijom za najmlađe, dok je za one starije garantovana zabava u PAN Winter Pubu, gdje će biti održavani koncerti, promocije i degustacije.

Podsjećanja radi, Coca-Cola Sarajevo Holiday Market zajednička je aktivnost Udruženja građana ZUP (Zona unaprijeđenog poslovanja) Baščaršija i Fondacije Sarajevo Navigator. Ovogodišnji Coca-Cola Sarajevo Holiday Market realizira se uz veliku podršku Općine Centar, na čelu sa načelnikom dr. Nedžadom Ajnadžićem, Grada Sarajeva, te Turističke zajednice Kantona Sarajevo.

TELEFONI U OPĆINI CENTAR

Centrala	387 33 562 300
Informacije	387 33 562 379
Općinski načelnik	387 33 562 310
Općinsko vijeće	387 33 562 311

Izdavač: OPĆINA | OPŠTINA CENTAR SARAJEVO

Glavni i odgovorni urednik: Safet Huremović

telefon 562 304 • WEB www.centar.ba • E-mail press@centar.ba

Priprema tekstova Kabinet Općinskog načelnika • Adresa Ulica Mis Irbina 1, 71000 Sarajevo • Faks 562-400 • Centrala 562-300 • Zamjenik urednika Đina Crnković 562-325 • DTP Služba za informatiku 562-330

• Saradnici Salih Horozović i Envera Pandžić, 562-427 • Bilten izlazi krajem svakog mjeseca • Štamparija Blicdruk Sarajevo • Tiraž 4. 000 primjeraka